


東晉南北朝輿地表
一



東晉南北朝輿地表

(一)

徐文苑撰

東晉南北朝輿地表序

子謨十七史商榷百卷一切典故無所不攷而其所尤盡心者地理也蓋人欲攷古必先明地理地理既明於古形勢情事皆如目睹然後國運之強弱政治之得失民生之利害人才之賢否皆可口講指畫不出戶庭而知四海九州之遠立乎今日而知數千百年之久皆在是矣此其所以爲通儒也不先明此而欲尋行數墨以求之此矮人看場所見能幾何哉地理之難知莫甚於割據之亂世漢末天下三分陳壽不作表志茲事已難研究晉一統裁二十三年當惠帝太安二年而僭僞並起自是以後羣雄雲擾閱一百三十七年直至劉宋文帝元嘉十六年而北方諸國始盡併於元魏自是爲南北朝矣魏衰高氏宇文

氏相繼與南朝鼎峙天下再三分直至隋文帝開皇九年始合爲一自太安二年至此凡二百八十七年區宇分裂未有甚於此時者也故地理爲最難明同里徐君文范字仲圖作東晉南北朝輿地表以年爲經以國爲緯旁行書之而又以晉初所分之二十州爲其緯中之緯下至隋煬帝罷州置郡而止追補千數百年前之志抑何博且精也書起太安而稱東晉者禍本雖始西晉但祇漢成二國餘皆在渡江以後可以東晉統言之也且史家之爲地志也其例有二有以全盛爲主者有以最後爲主者班固漢志據平帝元始司馬彪續漢志據順帝永和沈約宋志據孝武帝大明魏收魏志據孝靜帝武定新唐書據昭帝天祐此皆以最後爲主者也惟晉志據武帝太康舊唐志據元

帝天寶此二家則皆據其最盛時二者既各偏據其一則于沿革分合必有所遺孰若仲圖之包絡始末繩貫絲聯使糾紛錯互他人所望而目昧者豁然如指上螺文可一一數邪此專門之業非涉獵者所能及矣大抵地理志也表也圖也三者闕一不可若憎其煩絮欲求省淨則世間閑筆浪墨不知凡幾乃於實學所在惜其勞費乎仲圖此書爲昔人之所未及爲而後人攷史者之所必不可少洵有功於史學而足以傳矣予商榷於南北朝戰爭之所立國之界亦費苦心沾沾自喜而東晉諸僭僞則畏其繁亂而未暇詳予涉獵之功非專門之業所以稍有發揮未能臚列獨心折仲圖以爲不可及焉

乾隆五十七年壬子初夏西泚居士王鳴盛謨維時瞽目重開

行年七十有一

東晉南北朝輿地表序

讀史而不諳輿地譬猶瞽之無相也然兩漢唐宋之世區宇混一經緯秩如卽如三國之承漢五代十國之承唐封畛雖分名實未改稽古之彥搜索匪難獨典午渡江以後開皇平陳以前瓜剖豆分蓋三十國南北僑置千回百改史之存者十家而有志者才五晉則但述太康而不詳江左偏安之局魏則祇據武定而反遺洛陽全盛之規休文上攷沿革差有條理而或失之繁輔機兼籠五朝亦能貫串而或失之略子顯謏間更無譏矣杜佑李吉甫樂史輩於方輿之學最爲該洽而南北僑立之迹十闕其九非涉獵之未周良討論之未易也同里徐仲圃默而好深湛之思足迹不出百里而三條四列十道九域一一囊括

於心胸乃上溯太安下訖大業年經國緯表而次之先辨實土附以僑治其間分裂并合參互錯綜志有滲漏則采紀傳以證成之以予亦嘗從事於斯也每成一篇輒就商榷攷辨異同必得其當然後已旁觀匿笑謂其用心無用之地不知吾兩人之莫逆於心也古人謂作史莫難於志而時代久遠則攷證尤難晉隋兩書均出唐史臣之手而晉志之紕繆甚於隋志謂江左有南徐州南兖州南青州不知僑州加南昉於永初詔書晉世方鎮未有稱南兖南徐者也謂梁州立巴渠懷安宋熙懷漢安康諸郡不知皆宋所立且晉世不當先有宋熙之名也桓元立綏安郡非桓溫也襄陽僑立河南義成郡非秦雍流人也唐初去晉僅二百年而傳聞舛譌若此仲圃生於千載之後乃能鉤

稽載籍究其離合分割毫釐窮極玩眇雖身歷其時目覩其地者亦無以過自非有絕人之識用心專而爲日久安能爲古人之所難爲也哉此書出必有珍爲枕中之秘者予固非阿所好而云然也

乾隆五十有四年秋八月錢大昕譔

東晉南北朝輿地表凡例

晉武一天下有司兗豫冀幽并雍涼益梁青徐荆揚交廣十六州後又分雍涼爲秦幽爲平益爲寧凡一十九州惠帝割荆揚置江懷帝分江荆廣立湘凡二十一州湘雖或離或合然宋後至隋不廢故以二十一州爲斷

州郡設於武惠懷愍者並表著之其分立在元帝後及僞置州郡無論東晉竊據諸國與宋齊梁陳元魏周齊並排列西晉郡下貫串橫敘考史傳略記其時戰爭事爲證據至隋開皇初罷郡而止

郡縣表志建置沿革以太康地志郡縣名目自後隨諸國因改省併直遞至隋大業初罷州仍爲郡而止下格稍載山川及故

城遷徙就可攷見者注之亦惟以有關輿地者作引證若名勝足資遊覽者概不錄

年表年經國緯志各國所有之州郡縣或十數年或三五年隨時疆域鋪敘提明之以分割出入時有變易也若僑立空名必繫以晉時實地所在使不懸而無薄蕭氏三十國春秋未見其書不知所列名目然崔氏十六國似猶未盡故凡有叛亂竊據者雖不踰年必書之亦帶敘州郡表中焉

元魏歷年久疆域廣起自北荒兼併諸僭其雁門榆林上郡以北與宇文氏所開秦益西南境並在晉之域外設州郡司牧之郡國表年表於其所建置附近或另立一行標列之庶高車乙連柔然諸部鄧至宕昌吐谷渾諸國亦略可見矣

太康志首列司州重帝都也東晉統在建康故以揚州爲首自
元帝渡江所有半壁河山同於宋齊梁陳作史者特以正統所
在大書紀年而宋至隋開皇九年以前目爲南北朝究之南北
朝似可以元帝始也改元帝以前年表分爲卷首開皇一統以
後爲卷終

東晉充豫徐青諸州或割裂度屬或參差分境甚至幽冀司并
雍秦全無寸土而空設於晉陵廣陵襄陽漢中成帝後分揚之
宣城歷陽爲豫晉陵義興爲徐宋以浙東爲東揚州而惟以丹
陽吳興爲京畿荊州分河北立雍漢南爲郢梁分秦廣分越
徐兗並分南北齊并移司於南義陽梁武雖名開闢置州至百
而北未有懸瓠尙不能如宋初自太清後至陳地益促而州愈

多離合改易推求難尋休文謂宋時已然由後論之殆尤甚焉而燕秦二魏齊周又混雜紊亂北境自古亂未有若此之久竊據未有若此之多輿地未有若此之難明者予故以晉之州郡爲主起自惠帝太安二年癸亥依通鑑目錄託始也且漢與代並是年立號云

太安二年時已置江州而湘州尙未立荊州之魏興新城上庸三郡已屬梁梁之巴巴東涪陵三郡未屬益益之牂柯朱提二郡未入寧而平夷夜郎南廣西平河陽諸郡亦未分置卽臨賀始安始興桂陽並在江廣二部下郡國表標二十一州以晉之大勢而立諸州郡縣凡建置於惠懷愍時者列諸表以爲準若元帝建元後分立無論南北凡有實地可考見者鱗次備列郡

縣下其無實地僅以流民僑置或南北各自夸張虛設名目別附注於所立處以見焉總之去浮存實使不徒眩人目以混太康時之舊地如齊文宣之斬亂絲而歸於隋一統後所立州郡縣以明之夫江淮沔漢間南北戰爭朝暮互易重兵鎮戍各相假號其始借郡縣劃州其繼爲州補郡縣而終至於州郡縣多非其故地嗚呼此吾所以編集年表也夫

鮮卑慕容廆附近平幽其始與宇文段氏等耳通鑑因其後號入主中夏先立燕名究之斯時依然一鮮卑也但獨立一行以著其開基之有自

涼州張軌命自朝廷通鑑因其乘亂世據同諸僭國究之四傳至駿方儼若一國駿以前未嘗不奉晉正朔而有跋扈不臣之

迹如唐季方鎮之強梁也蓋軌斯時與幽州王浚并州劉琨同一刺史耳設使幽薊無石季龍之襲取及浚之身已稱王而建號矣寧能如涼州張氏乎劉琨艱難晉陽心跡非同彭祖昭然其見并州若非越石早入元海之手矣故年表以此三人並列刺史惟張氏另立一行先爲傳世作地亦可明呂光後之諸涼也

卷首凡僭國所據者備列之晉所有者概不注明以舉彼可見此也而於懷愍末年各歷敘諸州以總括之至元帝後則亦隨時標列其疆域焉有孤危之地獨能支持保全如李矩魏浚郭默魏駭荀藩荀組邵續劉遐諸人並表見之

石勒附漢漢實不能臣之溫公目錄當其與汲桑起事卽立後

趙一行不歸合漢下誠識越尋常但勒稱後趙因前趙別之也
淵聰時勒與劉曜比肩北面趙尙未改何得遽列勒後趙而別
之乎故年表於漢下另列一行以著其雄武强悍見元海雖英
邁勒亦助其成功晉氏雖庸懦非勒猶不至亂極建興以前攻
擊戰爭悉歸諸漢卽襄國旣建幽冀盡平而劉聰尙在前趙未
興依然漢有也日擴日闢勒所自取雖不混於漢之疆土而必
於元帝建武紀年始別後趙於劉曜云

楊茂搜據仇地數傳爲苻秦所滅後楊盛復據之爲宋所滅而
旋興爲元魏藩主又丁零翟遼稱魏爲後燕所滅譙縱據蜀爲
劉裕所滅今並表次之

十六國春秋附劉顯冉閔於後趙附西燕於後燕併漢於前趙

今各分列不混

吐谷渾僻處今甘肅四川徼外似不必表列然其立國與年表相終始且與西秦魏周干戈相尋秦州西陲亦嘗據有宋後亦通使大業初郡縣其地故雖無事繫附於末云

交州近林邑時擾日南九真故其王范文亦隨時見及至平州元菟樂浪帶方三郡自晉中葉燕衰高句麗據之至隋末嘗內屬故亦附見

晉時河尙北行入海其司兗冀瀕河之郡河南河內魏汲濮陽頓邱陽平陳畱任城清河平原信都樂陵勃海河間諸郡非如今之奪淮泗入海也故滑臺瀕河之東南與碭碭城並當河津之要而河水自遮害亭屈而東北流過黎陽南河之西岸爲黎